

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
Ministarstvo zdravstva**

Na osnovu člana 70. stav 4. Zakona o pravima, obavezama i odgovornostima pacijenata ("Službene novine Federacije BiH", broj: 40/10) Ministar zdravstva Zeničko-dobojskog kantona donosi

**PRAVILNIK
O ZDRAVSTVENOM SAVJETU MINISTARSTVA ZDRAVSTVA ZENIČKO-
DOBOJSKOG KANTONA**

DIO PRVI – OPĆE ODREDBE

**Član 1.
(Predmet)**

Ovim Pravilnikom određuje se broj i sastav članova Zdravstvenog savjeta Ministarstva zdravstva Zeničko-dobojskog kantona (u daljnjem tekstu: Zdravstveni savjet), mandat, način izbora i razrješenja članova, poslovi i zadaci, način rada i način finansiranja.

**Član 2.
(Zdravstveni savjet)**

Zdravstveni savjet je savjetodavno tijelo koje prati provođenje ostvarivanja prava pacijenata, u okviru prava i obaveza pacijenata na području Zeničko-dobojskog kantona (u daljem tekstu: Kanton).

DIO DRUGI – ZDRAVSTVENI SAVJET

**Član 3.
(Poslovi i zadaci Zdravstvenog savjeta)**

- (1) Zdravstveni savjet u skladu sa članom 71. Zakona o pravima, obavezama i odgovornostima pacijenata obavlja sljedeće poslove:
- a) prati provedbu ostvarivanja prava pacijenata saglasno Zakonu o pravima, obavezama i odgovornostima pacijenata,
 - b) prati provedbu obrazovnih aktivnosti u vezi sa pravima pacijenata,

- c) raspravlja o izvještajima zdravstvenih savjeta općina/grada,
 - d) daje mišljenja, preporuke i prijedloge nadležnim organima o utvrđenom stanju na području djelokruga rada zdravstvenih savjeta općina/grada,
 - e) predlaže preduzimanje mjera za izgradnju cjelovitog sistema zaštite i unapređenja prava pacijenata u Kantonu odnosno Federaciji,
 - f) daje inicijative za donošenje propisa kojima se unapređuju prava pacijenta, te mišljenje na propise iz ove oblasti koje pripremaju nadležni organi vlasti na svim nivoima,
 - g) saraduje sa organima i organizacijama iz oblasti zaštite i unapređenja prava pacijenata u Federaciji,
 - h) podnosi Ministru Ministarstva zdravstva (u daljem tekstu: Ministar zdravstva) godišnji izvještaj o radu,
 - i) obavještava javnost o povredama prava pacijenata,
 - j) obavlja i druge poslove koje mu dodjeli ministar zdravstva, u skladu sa Zakonom o pravima, obavezama i odgovornostima pacijenata i propisima donesenim na osnovu tog Zakona.
- (2) Zdravstveni savjet u obavljanju poslova i zadataka iz stava (1) ovog člana, predstavlja i zastupa interese pacijenata, mladih, Ministarstva zdravstva Zeničko-dobojskog kantona (u daljem tekstu: Ministarstvo zdravstva), komora iz oblasti zdravstva, stručnih udruženja, udruženja za zaštitu prava pacijenata, sindikata zdravstvenih ustanova, odnosno privatnih praksi, kao i Crvenog krsta/križa sa područja Kantona.

Član 4. **(Imenovanje i mandat)**

- (1) Zdravstveni savjet iz člana 2. ovog Pravilnika, imenuje i razrješava Ministar zdravstva,
- (2) Mandat članova Zdravstvenog savjeta traje 4 (četiri) godine,
- (3) Prilikom imenovanja zdravstvenog savjeta poštovat će se princip odražavanja ravnopravne zastupljenosti oba spola.

Član 5. **(Sastav zdravstvenog savjeta)**

- (1) Zdravstveni savjet ima osam članova, koji se biraju iz reda istaknutih stručnjaka, sa dokazanim moralnim i etičkim kvalitetima, u oblasti medicinskih, pravnih, ekonomskih, obrazovnih nauka, stručnjaka iz oblasti ljudskih resursa, etike i bioetike.
- (2) Zdravstveni savjet se sastoji od predstavnika:
 - a) Ministarstva zdravstva,
 - b) Ljekarske komore Zeničko-dobojskog kantona,
 - c) Farmaceutске komore Zeničko-dobojskog kantona,
 - d) Udruženja mladih,
 - e) Udruženja za zaštitu prava pacijenata,
 - f) Stručnih udruženja iz oblasti zdravstva,
 - g) Sindikata zdravstvenih ustanova, odnosno privatnih praksi,
 - h) Crvenog krsta/križa Kantona.

Član 6.
(Uvjeti za člana Zdravstvenog savjeta)

Kandidat za člana Zdravstvenog savjeta treba da ispunjava sljedeće uvjete:

- a) da je punoljetni državljanin Bosne i Hercegovine,
- b) da ima prijavljeno prebivalište na području Kantona,
- c) da ima minimalno tri godine radnog iskustva u oblasti u kojoj djeluje,
- d) da uživa ugled i ima evidentne rezultate rada u oblasti u kojoj djeluje.

Član 7.
(Postupak izbora članova Zdravstvenog savjeta)

- (1) Ministarstvo zdravstva objavljuje javni poziv za prikupljanje prijava za imenovanje Zdravstvenog savjeta.
- (2) Na osnovu javnog poziva iz stava (1) ovog člana, prijedlog članova za Zdravstveni savjet dostavljaju udruženja i nevladine organizacije koje su najmanje 5 godina upisane u registar na kantonalnom nivou, nezavisni strukovni sinikat radnika zaposlenih u zdravstvu Kantona i nezavisni strukovni sinikat doktora medicine i stomatologije Kantona, komore iz oblasti zdravstva i crveni križ/krst Kantona, u roku od 15 dana od dana objavljivanja javnog poziva.
- (3) Ministar zdravstva formira Komisiju za izbor i imenovanje članova zdravstvenog savjeta, sa zadatkom da izvrši otvaranje prispjelih prijava kandidata, utvrdi blagovremenost prijava i ispunjenost uvjeta, sačini zapisnik sa listom kandidata koji ispunjavaju uvjete za imenovanje u Zdravstveni savjet, koji dostavlja Ministru zdravstva.
- (4) Nakon provedene procedure iz stava (1), (2) i (3) ovog člana Ministar zdravstva donosi rješenje o imenovanju Zdravstvenog savjeta.

Član 8.
(Razrješenje članova Zdravstvenog savjeta)

- (1) Predsjednik i članovi Zdravstvenog savjeta mogu biti razriješeni i prije isteka mandata na koji su imenovani.
- (2) Ministar zdravstva može razriješiti predsjednika i članove Zdravstvenog savjeta i prije isteka mandata i to:
 - a) na lični zahtjev,
 - b) ako ne ispunjava svoje dužnosti kao član Zdravstvenog savjeta u skladu sa poslovníkom o radu (nedolazak na sjednice i sl.).

Član 9.
(Razmatranje izvještaja zdravstvenih savjeta općina/grada)

- (1) Zdravstveni savjet u okviru razmatranja izvještaja zdravstvenih savjeta općina/grada, prati provođenje ostvarivanja prava pacijenata s akcentom na:
 - a) dostupnost zdravstvene zaštite, uključujući i pravo na hitnu medicinsku pomoć,
 - b) pravo na informiranost pacijenta o njegovim pravima i obavezama,
 - c) povjerljivost informacija i privatnost, odnosno tajnost podataka iz medicinske dokumentacije.

- (2) Nakon razmatranja izvještaja iz stava (1) ovog člana, Zdravstveni savjet daje mišljenja, preporuke i prijedloge nadležnim organima o utvrđenom stanju na području djelokruga rada zdravstvenih savjeta općina/grada i Ministarstvu zdravstva, u cilju unapređenja prava pacijenata, mišljenja na propise iz oblasti zdravstva, sa posebnim akcentom na unapređenje i zaštitu prava trudnica i djece, mladih i starih osoba, osoba sa onesposobljenjima, osoba sa mentalnim poremećajima i oboljenjima i zaštiti prava pacijenata.

Član 10.
(Poslovnik o radu)

Zdravstveni savjet donosi poslovnik o radu kojim se bliže uređuje organizacija i način rada.

Član 11.
(Dužnost čuvanja službene tajne)

Članovi Zdravstvenog savjeta obavezni su u radu postupati na način da ne ugroze dužnost čuvanja službene tajne.

Član 12.
(Izvještaj o radu)

- (1) Zdravstveni savjet podnosi izvještaj o radu Ministru zdravstva, najmanje jednom godišnje, a po potrebi, na zahtjev Ministra zdravstva izvještaj podnosi i za kraći period.
- (2) Izvještaji iz stava (1) ovog člana, radi dostupnosti javnosti, objavljuju se na web stranici Ministarstva zdravstva.

Član 13.
(Naknada)

Članovima Zdravstvenog savjeta pripada naknada čiju visinu utvrđuje Ministar zdravstva posebnim rješenjem.

DIO TREĆI – PRELAZNE I ZAVRŠNE ODREDBE

Član 14.
(Stupanje na snagu)

Ovaj Pravilnik stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: 11-37-9493/18
Zenica, 12.06.2018. godine

